



Stigtingsjaar 1909

Privaat sak X11, Arcadia 0007
Tel. 086 133 3786
Faks 012 001 8787
E-pos: akademie@akademie.co.za
Webwerf: www.akademie.co.za

Engelenburghuis
Ziervogelstraat 574
Arcadia, Pretoria

SA AKADEMIEPRYSE 2018

Graag vestig ons u aandag op die Akademiepryse wat in 2018 vir toekenning oorweeg word. Kandidate vir enigeen van hierdie pryse kan tans by wyse van volledig gemotiveerde voorstelle genomineer word. Die volgende geld ten opsigte van die voorstelle:

- Die voorstel moet duidelik motiveer waarom die bepaalde kandidaat/instansie vir die bepaalde bekroning voorgestel word. Daar moet ook duidelik aangetoon word watter spesifieke publikasies/bydraes as bekronenswaardig beskou word.
- Dit moet verkieslik in Afrikaans wees.
- Dit moet deur 'n voorsteller en 'n sekondant onderteken wees.
- Die volle name van die kandidaat, asook van die voorsteller en sekondant, en hulle telefoon- en selfoonnommer, adres en e-posadres moet verskaf word.
- Die voorstel moet gesteun word deur die nuutste *curriculum vitae* en publikasielys van die kandidaat, indien van toepassing.
- Die grootste mate van vertroulikheid moet gehandhaaf word. Onder **GEEN** omstandighede mag die kandidaat daarvan bewus wees dat hy/sy vir 'n prys genomineer word nie. Dit het al in die verlede gebeur dat daar by potensiële kandidate verwagtinge geskep is wat vir die betrokke kandidaat en vir die SA Akademie groot verleentheid veroorsaak het.
- By die toekenning van pryse is die Akademieraad se besluit finaal. In die geval van 'n nominasie wat nie suksesvol was nie, sal **GEEN** korrespondensie of gesprekke ná toekenning gevoer word nie – nie met voorstellers nie en ook nie met kandidate nie.

Reglemente vir die onderskeie pryse is op aanvraag beskikbaar.

Die finale sluitingsdatum vir voorstelle is **31 Januarie 2018**, behalwe waar anders vermeld.

A. GEESTESWETENSKAPPE

1. Stalsprys

Die Stalsprys vir Geesteswetenskappe word jaarliks toegeken vir 'n hoogstaande publikasie of 'n reeks hoogstaande publikasies, by voorkeur, maar nie uitsluitlik nie, in Afrikaans. Verder word dit toegeken vir individuele of gesamentlike wetenskapsbeoefening en/of die lewering van individuele of gesamentlike produkte van hoogstaande gehalte waardeur buitengewone bydraes tot die wetenskapsbeoefening gemaak word. Spanprestasie of 'n bydrae tot spanprestasie, multi- en interdisiplinêre navorsing, en goeie implementerings- of evalueringnavorsing kan ook in berekening gebring word. Werk wat voor die bekroningsjaar gelewer is, sal vir die bekroning in aanmerking geneem word. Die volgende vakgebiede kom in 2018 aan die beurt:

- (i) Kunstewetenskappe; kunstegeskiedenis
- (ii) Multi- en interdisiplinêre spanwerk
- (iii) Kommunikasiekunde en joernalistiek; biblioteek- en inligtingkunde
- (iv) Sielkunde

2. Markus Viljoenmedalje vir Joernalistieke Prestasie

Die prys word toegeken vir langdurige hoogstaande werk in die Afrikaanse joernalistiek, hetsy in koerante of in tydskrifte. Die medalje kan elke drie jaar toegeken word. Die medalje kan slegs een maal word aan 'n bepaalde persoon toegeken word.

3. Toon van den Heeverprys vir Regswetenskap

Die prys word toegeken vir:

- (i) oorspronklike regs kundige werk in Afrikaans, en/of
- (ii) vollengteartikels wat in geakkrediteerde regstydskrifte of 'n artikel van hoogstaande gehalte in Afrikaans wat in 'n geakkrediteerde regstydskrif verskyn het, en/of
- (iii) baanbreker-regsuitsprake in Afrikaans.

4. CJ Langenhovenprys vir Taalwetenskap

Die prys is driejaarliks beskikbaar vir taalwetenskaplike en/of taalskeppende werk in Afrikaans, met inbegrip van die leksikografie.

5. Erepennig vir Wetenskaplike Vakbevordering

Die erepennig word toegeken vir die bevordering en ontwikkeling van 'n spesifieke vakgebied op enige terrein van die onderwys (van vroeë kinderonderwys tot tersiêre onderwys). Die erepennig kan net in uitsonderlike gevalle toegeken word. Geesteswetenskaplikes of natuurwetenskaplikes wat op die gebied van die onderwys presteer het, kom in aanmerking. (Sien nr. 13.)

6. Christo Wiesemedalje vir 'n Opkomende Entrepreneur

Die medalje word aan 'n kandidaat toegeken vir werk van hoogstaande gehalte.

Die volgende oorwegings geld by die keuse van 'n kandidaat:

- (i) Slegs Suid-Afrikaanse burgers wat in die toekenningsjaar 45 jaar of jonger is, kan vir die toekenning van die medalje in aanmerking kom.
- (ii) Die medalje word toegeken aan sakemanne en -vroue wat besondere struikelblokke moes oorkom om sukses te behaal.
- (iii) Persone wat die medalje ontvang, moes 'n besondere gehalte van ondernemerskap, visie en volharding aan die dag gelê het op grond waarvan hulle as private ondernemers sukses behaal het in
 - die vestiging/opbou van ('n) plaaslike onderneming(s);
 - die ontwikkeling/bemarking van 'n produk of produkte; en
 - die skepping van werkgeleenthede en welvaart.

Die prys word toegeken vir prestasies wat behaal is, maar word ook as 'n aanmoedigingsprys beskou en kan slegs een maal aan 'n bepaalde persoon toegeken word.

7. Protea Boekhuistoekenning

Die prys kan jaarliks om die beurt toegeken word vir die beste Afrikaanse verhandeling, proefskrif of gepubliseerde werk in geskiedenis of kultuurgeskiedenis. In 2018 kan die prys toegeken word vir 'n D-proefskrif. Kandidate wat in 2015, 2016 of 2017 'n graad ontvang het, kom in aanmerking.

8. Esther Greeffprys

Die prys word jaarliks toegeken, in 2018 vir die beste artikel wat gedurende 2016 in die *Tydskrif vir Geesteswetenskappe* gepubliseer is.

B. NATUURWETENSKAP EN TEGNOLOGIE

9. MT Steynmedalje vir Natuurwetenskaplike en Tegnologiese Prestasie

Dit is een van die voortreflikste eerbewyse van die Akademie vir leierskap op die hoogste vlak in die natuurwetenskap en die tegnologie. Die prys span die kroon op 'n lewenstaak en kan net een maal aan 'n bepaalde persoon toegeken word. Die kandidaat se skeppende bydraes tot die ontginning, organisasie en volgehoue uitbouing van 'n vertakking of vertakkings van die natuurwetenskap of die tegnologie wat as 'n wesenlike en belangrike bydrae tot die bevordering van die natuurwetenskap of die tegnologie beskou kan word, asook die suksesvolle toepassing daarvan in landsbelang, dien as maatstaf vir die toekenning.

10. Havengapry

Die Havengapry word jaarliks toegeken vir oorspronklike navorsing op natuurwetenskaplike en/of tegnologiese gebied. Die vereistes by die beoordeling van kandidate is eerstens die bydrae tot navorsingspublikasies en tweedens bewys van die bevordering van Afrikaans. Ander prestasies in belang van die wetenskap sal ook in aanmerking geneem word. Die prys kan net een maal aan 'n bepaalde persoon toegeken word. In 2018 kom die volgende vakgebiede aan die beurt:

- (i) Die fisiese wetenskappe (wiskundige, chemiese of fisiese wetenskappe).
- (ii) Die lewenswetenskappe, spesifiek navorsing op lewende materiaal, uitgesluit die mens (byvoorbeeld die landbou, die biologie of die veeartsenykunde).

11. FARMOVS-prys vir Farmakologie en Geneesmiddelontwikkeling

Die prys word driejaarliks vir voortreflike bydraes tot 'n vertakking of vertakkings van die farmakologie en geneesmiddelontwikkeling toegeken. Net een kandidaat kan op 'n keer bekroon word.

12. Erepennig van die Fakulteit Natuurwetenskap en Tegnologie

Hierdie erepennig word toegeken op terreine wat nie deur ander bekroningsgebiede binne die Fakulteit ondervang word nie en waarin enige persoon, binne die doelstellings van die Akademie, as bekronenswaardig beskou word. Dit word toegeken vir prestasies en bydraes ten opsigte van die bevordering en ontwikkeling van die besondere vakgebiede en kan net in uitsonderlike gevalle toegeken word.

13. Erepennig vir Wetenskaplike Vakbevordering

Die erepennig word toegeken vir die bevordering en ontwikkeling van 'n spesifieke vakgebied op enige terrein van die onderwys (van vroeë kinderonderwys tot tersiêre onderwys). Die erepennig kan net in uitsonderlike gevalle toegeken word. Geesteswetenskaplikes of natuurwetenskaplikes wat op die gebied van die onderwys presteer het, kom in aanmerking. (Sien nr. 5.)

14. Junior Kaptein Scottgedenkmedalje vir Dierkundige Wetenskappe

Die medalje kan jaarliks toegeken word vir die beste verhandeling ingedien by 'n Suid-Afrikaanse universiteit vir die M.Sc.-graad, om die beurt in die dierkundige of plantkundige wetenskappe. In 2018 kom dierkundige wetenskappe aan die beurt.

15. Douw Greeffprys

Die prys word toegeken vir die beste navorsings- of oorsigartikel wat gedurende die voorafgaande jaar in die *SA Tydskrif vir Natuurwetenskap en Tegnologie* verskyn het.

C. DIE KUNSTE

16. Hertzogprys vir Drama

Die prys word afwisselend vir drama, poësie en prosa toegeken. Alle gepubliseerde dramawerke van hoogstaande gehalte wat verskyn het in die drie kalenderjare wat die bekroning voorafgaan, kom vir dié toekenning in aanmerking.

17. Eugène Maraisprys

Die Eugène Maraisprys word toegeken vir 'n eerste of vroeë belletristiese publikasie in Afrikaans. Die prys is jaarliks beskikbaar en kan net een maal aan 'n bepaalde skrywer toegeken word.

18. Tienie Hollowaymedalje vir Kleuterliteratuur

Die medalje is driejaarliks beskikbaar en word toegeken aan 'n skrywer wat gedurende 'n tydperk deur die Akademiesraad bepaal, die beste werk van hoë gehalte in Afrikaans in die genre kleuterliteratuur gelewer het. Die kategorie kleuterliteratuur sluit boeke vir kinders onder agt jaar in, maar dié omskrywing word nie op 'n te beperkende wyse toegepas nie.

19. Elsabe Steenbergprys vir Vertaalde Kinder- en Jeugliteratuur in Afrikaans

Die prys kan driejaarliks toegeken word vir vertaalde kleuter- en kinderliteratuur in Afrikaans.

20. CL Engelbrechtopry vir Letterkunde in Afrikaans

In 2018 kan die prys toegeken word vir wetenskaplike navorsing in Afrikaans oor die Afrikaanse letterkunde.

21. Huberte Rupertprys vir Klassieke Musiek

Die prys is jaarliks beskikbaar. In 2018 kan een persoon in een van die volgende kategorieë bekroon word: Opleiers/onderwysers van klassieke musiek (met inbegrip van kundiges, beoordelaars en organiseerders).

22. Erepenning vir Visuele Kunste

Die Akademie se erepenning is bedoel as erkenning, binne die doelstellings van die Akademie, van besondere prestasie op terreine wat nie suiwer letterkundig of wetenskaplik is nie. Die volgende kunsvorme word ingesluit: die skilderkuns, die beeldhoukuns, argitektuur, weefwerk, keramiek, mosaïek, fotografie, die advertensiewese en animasierolprente.

23. Erepenning vir 'n Afrikaanse Radiohoorbeeld

Die erepenning word twee keer in 'n siklus van drie jaar toegeken. Dit geskied om die beurt vir Afrikaanse hoorspele (waarby radiovervolgverhale ingesluit is) en Afrikaanse hoorbeelde. In 2018 kom radiohoorbeelde aan die beurt. Werke wat uitgesaai is deur enige uitsaainetwerk in die drie kalenderjare wat die bekroningsjaar voorafgegaan het, kom in aanmerking.

24. Deleen Bekkerprys vir 'n Rolprentdraaiboek in Afrikaans

In 2018 word die prys toegeken vir die beste draaiboek vir 'n rolprent in Afrikaans. Draaiboeke van Afrikaanse rolprente wat in die voorafgaande drie jaar (dus 2015, 2016 en 2017) vertoon is, kom in aanmerking.

(w.g.) Linda Brink
Koördineerder: Projekte